

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-10-Z/17
Kakanj, 27.07.2017. godine

Z A P I S N I K

sa 10. redovne sjednice Općinskog vijeća održane 27.07.2017. godine (četvrtak) u velikoj sali za sastanke Općinskog vijeća sa početkom u 9:00 sati (sažetak zapisnika)

Nakon intoniranja himne Bosne i Hercegovine, 10. sjednicu Općinskog vijeća otvorio je Slaven Katičić, predsjedavajući Općinskog vijeća, i pozdravio prisutne: općinske vijećnike i vijećnice, općinskog načelnika, pomoćnike općinskog načelnika, izvjestioce, obrađivače, predstavnike medija i goste.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Muhamed Kubat, Aldin Šljivo, Edin Aliefendić, Mejrema Purišević, Senad Alajbegović, Haris Veispahić, Adnan Ibrahimspahić, Amar Selimović i Safet Šahman **(SDA)**

Semir Mušija, Rizah Haračić, Jasmin Mušanović, Mirnes Merdić i Mugdin Gorak **(SBB BiH)**

Mirsad Tursum, Rešad Merdić, Fahrudin Buza, Adisa Škulj i Zerina Kovač **(S BiH)**

Ahmed Begić i Eldin Mijoč **(SDP BiH)**

Nusret Muslić i Sedmedin Amidić **(DF)**

Slaven Katičić i Ivica Petrović **(HDZ BiH)**

Elvedin Delić **(A-SDA)**

Mujo Fafulić – **nezavisni kandidat iz reda nacionalnih manjina.**

Odsutni vijećnici: Džemal Bečirhodžić i Izudin Hrusto **(SDA)**, Enes Piljug **(SDP BiH)**, Jasmin Mušanović **(SBB BiH)**.

Predsjedavajući je konstatirao da je na sjednici u momentu prijave prisutno 26 vijećnika i vijećnica te da su se stekli svi potrebni uvjeti za validan rad i odlučivanje Općinskog vijeća.

Pored vijećnika sjednici su prisustvovali:

Nermin Mandra, općinski načelnik

Ferdo Mijač, sekretar Općinskog vijeća

Mirza Fazlić, pomoćnik općinskog načelnika za privredu, urbanizam i zaštitu okoline

Bahrudin Arnaut, pomoćnik općinskog načelnika za opću upravu, radne i zajedničke poslove, lokalnu samoupravu i mjesne zajednice – po ovlaštenju

Džihad Berbić, pomoćnik općinskog načelnika za finansije

Nurčo Kurtović, pomoćnik općinskog načelnika za imovinskopravne, geodetske poslove i katastar nekretnina

Rešad Zaimović, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Zijad Neimarlija, direktor Zavoda za planiranje i izgradnju općine Kakanj

Izvjestioci, obrađivači, gosti

Mirnes Bajtarević – direktor JP „Grijanje“ d.o.o. Kakanj

Sead Imamović – direktor JP „Vodokom“ d.o.o. Kakanj

Fehim Merdić – predsjednik Sindikata JP „Vodokom“ d.o.o. Kakanj

Amir Dedić – predsjednik Radne grupe za izradu odluke o dimnjačarskoj djelatnosti

Sedin Karahodžić – predsjednik Komisije za provođenje izbora u mjesnim zajednicama općine Kakanj

Edin Bjelopoljač – predsjednik Komisije za provođenje procedure izbora lica na stručnom osposobljavanju bez zasnivanja radnog odnosa i poslodavaca

Predstavnici medija:

NTV IC Kakanj

„Naša riječ“

„Kaportal“

Radio Kakanj

„Kakanjlive“

„Kakanjske novine“

„Kakanj-x“

Kratka saopćenja o radu sjednice i prethodnim pitanjima:

Predsjedavajući je rekao da je Kolegij Općinskog vijeća 20/07/2017. godine u 15:30 održao 9. sjednicu na kojoj je razmatrao: Zahtjev za prijenos vlasništva nad izgrađenim vodovodnim i kanalizacionim sistemima čija je izgradnja finansirana od strane Općine Kakanj i Žalbu advokata Suada Agića, Ševale Demir, Amine Zulić i Ante Grgića.

U vezi Zahtjeva za prijenos vlasništva nad izgrađenim vodovodnim i kanalizacionim sistemima čija je izgradnja finansirana od strane Općine Kakanj, Kolegij je odlučio isti uputiti općinskom načelniku da sa nadležnim službama razmotri mogućnosti i pripremi prijedlog odluke.

U vezi Žalbe advokata Suada Agića, Ševale Demir, Amine Zulić i Ante Grgića u vezi naplate potraživanja JP „Grijanje“ d.o.o. Kakanj, Kolegij je donio zaključak da se od JP „Grijanje“ d.o.o Kakanj zatraži informacija o tome kakva je dosad bila praksa, odnosno koji su efekti angažiranja advokata.

Usvajanje zapisnika sa 9. sjednice Općinskog vijeća

Predsjedavajući je zapisnik sa 9. sjednice Vijeća stavio na razmatranje. Pošto nije bilo prijavljenih diskutanata, predsjedavajući je nakon glasanja konstatirao da je isti usvojen sa 26 glasova za, niko protiv i niko uzdržan.

Komentari na dostavljena mišljenja na vijećničke inicijative:

Rizah Haračić: je rekao da nije zadovoljan mišljenjem na vijećničku inicijativu vezanu za postavljanje usporivača brzine i tražio da se još jednom razmotri mogućnost postavljanja istih na lokaciji Željezničke ulice. U vezi druge vijećničke inicijative i postavljanja saobraćajne signalizacije o ograničenju brzine tražio je da se još jednom razmotri mogućnost da se na onim mjestima gdje nema realne opasnosti po druge učesnike u saobraćaju ta ograničenja uklone.

Vijećnička pitanja:

Mejrema Purišević: je postavila dva vijećnička pitanja u vezi statusa projekta javne rasvjete u MZ Bukovlje i u vezi dovodenja česme Šumonjičke u stanje prihvatljivo za korisnike.

Ahmed Begić: je postavio pitanje u vezi realizacije projekta kanalizacione mreže u naseljenom mjestu Stambene u MZ Dobož.

Nusret Muslić: je postavio vijećničko pitanje da li su izmirene sve obaveze prema dosadašnjim predsjednicima mjesnih zajednica u prethodnom mandatu, kolike su naknade predsjednicima mjesnih zajednica i na koji način se vrši isplata ovih naknada.

Sedmedin Amidić: je postavio vijećničko pitanje zašto je na drugi dan Bajrama, koji je proglašen i Danom šehida, održan koncert grupe Divanhana.

Rizah Haračić: je postavio vijećničko pitanje da li je saobraćajnica od direkcije RMU Kakanj do slastičarne „Egipat“ dvosmjerna ili jednosmjerna i da li se vodilo računa prilikom iscrtavanja horizontalne signalizacije.

Semir Mušija: je postavio pitanje u vezi uplata priređivača igara na sreću (kladionice) po osnovu obaveze na istaknutu firmu.

Aldin Šljivo: je postavio vijećničko pitanje u vezi prodaje krovne etaže tržnog centra REAL.

Vijećničke inicijative:

Haris Veispahić: je predložio da se napravi pauza od 9:50 do 10:30 kako bi oni koji hoće mogli otići na polaganje cvijeća zbog obilježavanja Dana ustanka naroda BiH.

Semir Mušija: je podnio vijećničku inicijativu prema JP „Vodokom“ d.o.o. Kakanj da pokuša iznaći sredstva za sanaciju puta koji vodi prema izletištu Bukovica (makadamski put) i vijećničku inicijativu da se uredi i očisti korito rijeke Zgošće na potezu od tržnog centra „Real“ do ušća u rijeku Bosnu.

Mejrema Purišević: je podnijela vijećničku inicijativu prema JU Dom zdravlja Kakanj da se omogući patronažna posjeta porodiljama u prvih 7-10 dana nakon poroda i vijećničku inicijativu prema Ministarstvu za prostorno uređenje, promet i komunikacije ZDK da se na regionalnom putu R 445, Kakanj-Visoko na potezu od Mlina kod Čišije do mesnice „Balešić“ izvrši postavljanje i zavarivanje nedostajućih metalnih rešetki na slivnicima.

Nusret Muslić: je podnio vijećničku inicijativu da se do početka školske godine postave usporivači brzine u Albaniji na izlazu kod kuće Fadila Kubata.

Sedmedin Amidić: je ponovio svoju vijećničku inicijativu da se na lokaciji rijeke Trstionice u dijelu MZ Halinovići i Nažbilj izvrši postavljanje pješačkog mosta.

Rizah Haračić: je podnio vijećničku inicijativu za rješavanje glasne muzike na području općine Kakanj (na užem području grada) i vijećničku inicijativu za rješavanje problema poligona potrebnog kod praktičnog polaganja vozačkih ispita.

Edin Aliefendić: je podnio vijećničku inicijativu za donošenje odluke o utvrđivanju javnog interesa, eksproprijaciji zemljišta te izradu dokumentacije za uređenje pristupnog puta koji vodi do vodozahvata „Bukovica“ kao i zemljišta koje se nalazi u prvoj zaštitnoj zoni oko vodozahvata „Bukovica“.

Aldin Šljivo: je podnio vijećničku inicijativu da se pokrene procedura realizacije usvojenog projekta Ekopark „Tršće“ za koji su sredstva obezbjeđena u Budžetu Općine Kakanj za 2017.godinu.

Mirnes Merdić: je podnio vijećničku inicijativu nadležnoj općinskoj službi a odnosi se za područje mjesne zajednice Brnjic tj. sanaciju puta od starog doma u Brnjicu do mjesta Jejice (Ponijeri).

Amar Selimović: je podnio vijećničku inicijativu da se uradi adekvatna sanacija udubljenja na regionalnoj cesti Kakanj – Bilješevo u blizini tople vode Tičići.

Općinski načelnik: je, u vezi inicijative za iznalaženje poligona za autoškole, rekao da je izmiještanjem buvlje pijace sa poligona kod OŠ „Hamdija Kreševljaković“ taj prostor subotom ostao prazan te da bi nadležne službe trebale preuzeti zadatak da se ovaj prostor preinači za ovu namjenu subotom.

Utvrđivanje dnevnog reda

Predsjedavajući je za današnju sjednicu predložio dnevni red (po pozivu) koji je usaglašen na sjednici Kolegija Općinskoga vijeća održanoj 20.07.2017. godine. U međuvremenu su pristigli i materijali: prijedlog odluke o produženju važenja Strategije razvoja Općine Kakanj 2007-2017, Izvještaj o radu Komisije za provođenje procedure izbora lica na stručnom osposobljavanju bez zasnivanja radnog odnosa i poslodavaca sa prijedlogom zaključka o visini naknade za rad članovima Komisije te je predsjedavajući predložio da se prijedlog odluke o produženju važenja Strategije razvoja Općine Kakanj 2007-2017 uvrsti kao 1. tačka dnevnog reda, a Izvještaj kao 5.tačka dnevnog reda. Pristigao je i Izvještaj o radu Komisije za sprovođenje javnog nadmetanja-licitacije pri prodaji nekretnina – poslovnih prostora u vlasništvu Općine Kakanj i predloženo da se isti uvrsti kao 12. tačka dnevnog reda. S ovim dopunama Vijeće bi razmatralo 12 tačkara dnevnog reda. Također, po intervenciji Općinskog suda, obzirom da nije u nadležnosti Općinskog vijeća da usvaja ovaj Izvještaj, predloženo je da se Izvještaj o radu Općinskog suda razmatra u vidu informacije.

U diskusiji o dnevnom redu učestvovali su: Edin Aliefendić, Rizah Haračić i Ivica Petrović.

Edin Aliefendić: je predložio da se u dnevni red uvrsti i prijedlog odluke o dopuni Odluke o radnom vremenu u određenim djelatnostima kako bi se rad ugostiteljskih objekata prilagodio manifestaciji „Kakanjski dani“.

Predsjedavajući: je rekao da u skladu sa stavom 5, člana 63. Poslovnika o radu Općinskog vijeća, predlagač mora predočiti i materijal uz prijedlog dopune dnevnog reda.

Rizah Haračić: je podržao prijedlog vijećnika Aliefendića i rekao da bi se ova tematika trebala proširiti i na glasnu muziku iza 22:00h u užem području grada.

Ivica Petrović: je ispred kluba vijećnika HDZ-a tražio pauzu od 1h kako bi se prijedlog odluke vijećnika Aliefendića sačinio i kako bi oni koji žele mogli ići na polaganje cvijeća za Dan ustanka naroda BiH.

Predsjedavajući je najavio pauzu do 10:30.

Nakon pauze predsjedavajući je predložio da se uz izmjene i dopune koje je ranije naveo i prijedlog vijećnika Aliefendića dnevni red usvoji. Dnevni red usvojen je sa 24 glasa za, niko protiv i niko uzdržan.

Usvojeni dnevni red:

1. Prijedlog odluke o produženju važenja Strategije razvoja općine Kakanj 2007-2017
2. Prijedlog odluke o dimnjačarskoj djelatnosti
3. Usvajanje Izvještaja o provedenim izborima u mjesnim zajednicama općine Kakanj
4. Prijedlog odluke o potvrđivanju rezultata izbora i dodjeli mandata za članove savjeta mjesnih zajednica na području općine Kakanj
5. Usvajanje Izvještaja o radu Komisije za provođenje procedure izbora lica na stručnom osposobljavanju bez zasnivanja radnog odnosa i poslodavaca sa prijedlogom Zaključka o visini naknade za rad članovima Komisije
6. Usvajanje Izvještaja o poslovanju JP „Grijanje“ d.o.o. Kakanj za 2016.godinu
7. Prijedlog odluke o izmjenama i dopunama Odluke o zagrijavanju stambenog i poslovnog prostora u Kaknju daljinskim grijanjem i Uslova za isporuku i preuzimanje toplotne energije iz daljinskog grijanja
8. Usvajanje Izvještaja o poslovanju JP „Vodokom“ d.o.o. Kakanj za 2016.godinu
9. Prijedlog Kolektivnog ugovora o pravima i obavezama poslodavca i radnika komunalnog preduzeća JP „Vodokom“ d.o.o. Kakanj
10. Razmatranje Informacije o radu Općinskog suda u Kaknju za 2016.godinu
11. Usvajanje Izvještaja o radu stalnih radnih tijela Općinskog vijeća za period januar-juni 2017.godine
12. Usvajanje Izvještaja o radu Komisije za sprovođenje javnog nadmetanja-licitacije pri prodaji nekretnina-poslovnih prostora u vlasništvu Općine Kakanj
13. Prijedlog odluke o dopuni Odluke o radnom vremenu u određenim djelatnostima

Tačka 1.

Prijedlog odluke o produženju važenja Strategije razvoja općine Kakanj 2007-2017.

Predlagač: Općinski načelnik;

Obrađivač: Služba za privredu, urbanizam i zaštitu okoline;

Izjavitelj: Mirza Fazlić, pomoćnik općinskog načelnika;

U diskusiji o ovoj tački dnevnog reda nije niko učestvovao pa je predsjedavajući Prijedlog odluke o produženju važenja Strategije razvoja općine Kakanj 2007-2017. stavio na glasanje i nakon glasanja konstatirao da je isti usvojen sa 24 glasa za, niko protiv i niko uzdržan.

Tačka 2.

Prijedlog odluke o dimnjačarskoj djelatnosti

Predlagač: Općinski načelnik;

Obrađivač: Radna grupa za izradu odluke o dimnjačarskoj djelatnosti;

Izjavitelj: Amir Dedić, predsjednik Radne grupe;

U diskusiji su učestvovali: Adnan Ibrahimspahić, Haris Veispahić i Sedmedin Amidić.

Adnan Ibrahimspahić: je predložio da se zbog uočenog ponavljanja u članu 2. prijedloga odluke briše stav 1. a stav 2. postane stav 1. te da se preformuliše i glasi: „Pod dimnjačarskom djelatnošću smatra se obavljanje dimnjačarskih poslova i to:..“ a taksativni nastavak ostaje isti.

Haris Veispahić: je rekao da će klub vijećnika SDA prihvatiti prijedlog odluke uz amandman vijećnika Ibrahimspahića te predložio izmjenu i dopunu sljedećih članova: u članu 5. stav 1. iza riječi „ovlaštena“ dodaju se riječi „i obavezna“. U istom članu, iza stava 1. dodati stav 2 koji glasi: „Za obavljanje obaveznu kontrolu, dimnjačarska služba nema pravo izvršiti naplatu usluge, a u slučaju uočenih nedostataka na dimnovodnom objektu postupit će na način propisan članom 19. stav (1) ove Odluke.“ Dosadašnji stavovi 2. i 3. Postaju 3. i 4. U članu 7. u stavu 3. brisati riječi: „osim dimnovodnih kanala i kotlova centralnog grijanja“, a iza riječi „domaćinstvima“ staviti tačku. U članu 26. stav 1. tačka 2. , dodati i stav 4. Dodao je da su predložene izmjene usmjerene na lakšu primjenu u praksi i rekao kako vlasnici objekata ne bi trebali biti primorani na korištenje usluga iz dimnjačarske djelatnosti.

Sedmedin Amidić: je ispred kluba vijećnika DF rekao da će podržati prijedlog odluke, te se složio s diskusijom vijećnika Veispahića u vezi obaveze korištenja dimnjačarskih usluga. Upitao je ko vrši certificiranje dimnjačara i ko će biti odgovoran za eventualnu nastalu štetu na objektima.

Amir Dedić: je rekao da su amandmani vijećnika Ibrahimspahića i Veispahića prihvatljivi i dodao da vršenje navedenih usluga neće biti nametnuto građanima i da će za eventualno nastalu štetu prilikom obavljanja usluga iz dimnjačarske djelatnosti odgovarati štetnik kako je regulisano Zakonom o obligacionim odnosima.

Predsjedavajući ističe da predložene izmjene i dopune prijedloga odluke postaju sastavni dio iste i stavlja prijedlog na glasanje. Nakon glasanja je konstatirao da je prijedlog usvojen sa 25 glasova za, niko protiv i niko uzdržan.

Tačka 3.

Usvajanje Izvještaja o provedenim izborima u mjesnim zajednicama općine Kakanj

Tačka 4.

Prijedlog odluke o potvrđivanju rezultata izbora i dodjeli mandata za članove savjeta mjesnih zajednica na području općine Kakanj

Predlagač: Komisija za provođenje izbora u mjesnim zajednicama općine Kakanj;

Obrađivač: Komisija za provođenje izbora u mjesnim zajednicama općine Kakanj;

Izjavitelj: Bahrudin Arnaut, pomoćnik općinskog načelnika – po ovlaštenju;

Na prijedlog predsjedavajućeg Vijeće je vodilo objedinjenu raspravu o tačkama 3. i 4.

U diskusiji su učestvovali: Haris Veispahić, Rizah Haračić, Safet Šahman i Slaven Katičić.

Haris Veispahić: je pohvalio rad Komisije koja je provela izbore u mjesnim zajednicama i čestitao izabranim predstavnicima mjesnih zajednica. Dodao je kako će se određeni nedostaci u narednom periodu urediti normativnim aktom Vijeća i istaknuo povećan obim poslova predsjednika mjesnih zajednica što će iziskivati od Vijeća razmatranje vrednovanja rada ovih predstavnika. Naveo je da je suvišan podatak o nacionalnosti članova Savjeta.

Rizah Haračić: je čestitao izabranim predstavnicima mjesnih zajednica te ukazao na određene propuste prilikom izbora u pogledu neuslovnih prostorija za glasanje te predložio da se u budućnosti na ovo obrati pažnja. Iznio je lični stav da izbori za članove savjeta mjesnih zajednica gube smisao jer sastav savjeta nije proporcionalan glasovima koje kandidat dobije već se samo zadovoljava predstavništvo po podružnicama. Predložio je da se ubuduće ova nepravilnost na neki način izmijeni jer nema smisla da u savjet mjesne zajednice uđe predstavnik jedne podružnice sa samo 5 glasova, a ne uđe predstavnik druge podružnice sa 70 glasova.

Safet Šahman: je sugerirao izmjenu Odluke o provođenju izbora u mjesnim zajednicama kako bi se izbori održali u jesen. Upitao je kako će se izabrati članovi savjeta mjesnih zajednica iz podružnica koje nisu imale svoje kandidate.

Slaven Katičić: je čestitao Komisiji i nadležnoj službi na dobro obavljenom poslu. Osvrnuo se na prethodnu diskusiju i rekao da podatak o nacionalnoj zastupljenosti na izborima mjesnih zajednica nije suvišan i da je to regulisano Statutom. Predložio je zaključak da se sugeriše općinskom načelniku i službi nadležnoj za mjesne zajednice da se za buduće izbore napravi analiza o tome koje od mjesnih zajednica imaju svoje društvene prostorije i da se izdvoji dio sredstava za pokrivanje minimalnih komunalnih usluga struje i vode. Na kraju je dodao da će klub vijećnika HDZ podržati i Izvještaj i prijedlog odluke.

Bahrudin Arnaut: je odgovorio da je podatak o nacionalnoj zastupljenosti na izborima regulisan Statutom zbog čega se i nalazi u Izvještaju. Rekao je da postoje detaljne informacije o društvenim prostorijama u mjesnim zajednicama i da će se raditi na tome da se odvoje određeni iznosi za potrebe istih. Što se tiče podružnica koje nisu imale predstavnike, rekao je da se održavaju zborovi u tim mjesnim zajednicama radi biranja članova savjeta i kompletiranja savjeta mjesnih zajednica.

Predsjedavajući je Izvještaj o provedenim izborima u mjesnim zajednicama općine Kakanj uz zaključak koji je predložio (o izdvajanju minimalnih sredstava za komunalne usluge) stavio na glasanje i isti su usvojeni sa 25 glasova za, niko protiv i niko uzdržan.

Nakon toga, predsjedavajući je prijedlog odluke o potvrđivanju rezultata izbora i dodjeli mandata za članove savjeta mjesnih zajednica na području općine Kakanj stavio na glasanje i nakon glasanja konstatirao da je isti usvojen sa 24 glasa za, niko protiv i niko uzdržan.

Tačka 5.

Usvajanje Izvještaja o radu Komisije za provođenje procedure izbora lica na stručnom osposobljavanju bez zasnivanja radnog odnosa i poslodavaca sa prijedlogom zaključka o visini naknade za rad članovima Komisije

Predlagač: Komisija za provođenje procedure izbora lica na stručnom osposobljavanju

Obrađivač: Komisija za provođenje procedure izbora lica na stručnom osposobljavanju

Izjavitelj: Edin Bjelopoljak, predsjednik Komisije

U diskusiji je učestvovao Semir Mušija.

Semir Mušija: je predložio naknadu članovima Komisije za izbor lica na stručnom osposobljavanju: predsjedniku Komisije 150,00KM, a za članove 100,00KM.

Usljedila je pauza u radu Vijeća od 5' na prijedlog kluba vijećnika HDZ-a.

Nakon pauze, predsjedavajući poziva predsjednika Komisije da se izjasni o prijedlogu vijećnika u vezi naknada.

Edin Bjelopoljak: je predložio naknadu članovima Komisije na prošlogodišnjem nivou: predsjedniku Komisije 250,00KM a za članove 150,00KM.

Nakon diskusije, predsjedavajući je Izvještaj o radu Komisije za provođenje procedure izbora lica na stručnom osposobljavanju bez zasnivanja radnog odnosa i poslodavaca sa prijedlogom zaključka o visini naknade za rad članovima Komisije stavio na glasanje i nakon glasanja konstatirao da su isti usvojeni sa 22 glasa za, niko protiv i 2 uzdržana.

Tačka 6.

Usvajanje Izvještaja o poslovanju JP „Grijanje“ d.o.o. Kakanj za 2016.godinu

Predlagač: Skupština JP „Grijanje“ d.o.o. Kakanj;

Obrađivač: Skupština JP „Grijanje“ d.o.o. Kakanj;

Izjavitelj: Mirnes Bajtarević, direktor JP;

U diskusiji su učestvovali: Sedmedin Amidić, Rešad Merdić, Rizah Haračić i Haris Veispahić.

Sedmedin Amidić: je govorio o rashodima JP „Grijanje“ i upitao zašto je isplaćen regres u iznosu od 600KM, zašto su napravljene pozajmice i po čijoj odluci, kako se napravila razlika od 1.500KM u stavci subvencije za volontere, ko je platio porez na dobit za isplate nakanda nadzornom i revizorskom odboru, i zašto je topli obrok po danu bio 12KM, umjesto 8,15-8,50KM.

Rešad Merdić: je pohvalio rad ovog preduzeća za prethodnu sezonu kao i pozitivno poslovanje. Izrazio je zabrinutost zbog smanjenja broja korisnika i predložio da se radi smanjenja troškova reducira volontiranje. Osvrnuo se na model proširenja grijanja kao i način ugradnje mjerila za potrošnju.

Rizah Haračić: je pohvalio rad JP „Grijanje“ u pogledu rekonstrukcije kritičnih dijelova i sugerisao korigovanje cijena u vremenu prije i poslije sezone grijanja kada se isporučuje manja količina toplotne energije.

Haris Veispahić: je rekao da je u izlaganju direktora JP „Grijanje“ nedostajalo optimizma jer je ovo preduzeće ispunilo svoju misiju za ovu sezonu. Istina je da ima problema ali budućnost grijanja se ogleda prije svega u rekonstrukciji primarnog vrelovoda koji je u finansijskom smislu nedostižan ovom preduzeću. Za finansijska sredstva rekonstrukcije treba se pobrinuti lokalna uprava i već naredne godine inicirat će se prijedlog da se to i učini. U vezi diskusije vijećnika Merdića o ugrađivanju kalorimetara rekao je da je problem to što se korisnici ne mogu obavezati da isti ugrade. Oni korisnici koji imaju izolovane objekte i ostvare uštedu a oni koji ne ispunjavaju standarde nemaju ni interes da mjere potrošnju.

Nakon diskusije, predsjedavajući je Izvještaj o poslovanju JP „Grijanje“ d.o.o. Kakanj za 2016.godinu stavio na glasanje i nakon glasanja konstatirao da je isti usvojen sa 22 glasa za, 2 protiv i niko uzdržan.

Tačka 7.

Prijedlog odluke o izmjenama i dopunama Odluke o zagrijavanju stambenog i poslovnog prostora u Kakanju daljinskim grijanjem i Uslova za isporuku i preuzimanje toplotne energije iz daljinskog grijanja

Predlagatelj: Skupština JP „Grijanje“ d.o.o. Kakanj

Obrađivač: Skupština JP „Grijanje“ d.o.o. Kakanj

Izjavitelj: Mirnes Bajtarević, direktor JP

Stav i mišljenje: Komisija za ljudska prava i ravnopravnost spolova, Komisija za Statut i propise

U diskusiji su učestvovali: Semir Mušija, Rešad Merdić, Nusret Muslić, Ahmed Begić, Haris Veispahić i Rizah Haračić.

Semir Mušija: je predložio zaključak da se zaduži uprava JP „Grijanje“ da za iduću sjednicu pripremi novu odluku o tarifnom sistemu u periodu 1-15.10. tekuće i 15-30.04.naredne godine cijene grijanja naplaćivale u iznosu 60-70%. Tražio je da se prije izjašnjavanja o prijedlogu odluke Vijeće izjasni o njegovom zaključku.

Rešad Merdić: je podržao prijedlog vijećnika Mušije i predložio da Skupština JP dostavi prijedlog navedenih izmjena na usvajanje.

Nusret Muslić: je rekao da je predložena odluka prihvatljiva, obzirom na problem klimatskih promjena i zbog nemogućnosti JP „Grijanje“ da svoj rad uskladi sa istim.

Ahmed Begić: je rekao da će se ovom odlukom opteretiti kućni budžeti korisnika i dodao da je stanje u ovom preduzeću takvo zato što se 30 godina u njega ništa ne ulaže. U vezi ankete rekao je da je upitno koliko je ista vjerodostojna obzirom na mali broj ispitanika te s tim u vezi rekao da bi najbolje bilo anketirati ljude ponovo kako bi se dobila vjerodostojna brojka korisnika na osnovu koje bi se ovakve odluke mogle donositi.

Haris Veispahić: se složio s diskusijom vijećnika Begića u dijelu koji se odnosi na situaciju u ovom preduzeću nakon 30 godina. Prema inicijalnoj ideji grijanje u Kaknju je trebalo da bude socijalne prirode a ne ekonomske sve zbog toga što je amortizacija sistema grijanja 20 godina, a postojeći sistem je 30 godina u funkciji. Također, dodao je da koliko god cijene usluga daljinskog grijanja rastu, to neće biti dovoljno za budućnost ovog sistema.

Rizah Haračić: je istakao da budućnost „Grijanja“ treba biti proširenje sistema grijanja radi povećanja dobiti preduzeća i to u dijelovima općine gdje će biti više korisnika. Osvrnuo se i na prethodna izlaganja u pogledu cijena usluga i također smatra da se treba uvesti novi tarifni sistem za prijelazne periode u godini.

Usljedila je pauza u radu Vijeća od 5' na prijedlog kluba vijećnika SBB-a.

Nakon pauze za diskusiju se javio Slaven Katičić.

Slaven Katičić: se javio na prethodne diskusije i rekao da je namjera uprave preduzeća jasna i dobronamjerna te da se išlo u smjeru da se zadovolje korisnici a ne da se dodatno opterećuju kućni budžeti korisnika, obzirom da se u prijelaznom periodu grijanjem na struju izlože možda i većem trošku. Predložio je da se prijedlog odluke usvoji.

Mirnes Bajtarević: je rekao da je ovu diskusiju shvatio dobronamjerno te rekao da će uprava JP Grijanje sve sugestije razmotriti te stav o njima dostaviti do iduće sjednice Kolegija Općinskog vijeća. Na kraju je predložio da se prijedlog odluke usvoji u izvornom obliku.

Nakon diskusije, predsjedavajući je prijedlog odluke o izmjenama i dopunama Odluke o zagrijavanju stambenog i poslovnog prostora u Kaknju daljinskim grijanjem i Uslova za isporuku i preuzimanje toplotne energije iz daljinskog grijanja stavio na glasanje i nakon glasanja konstatirao da je usvojen sa 22 glasa za, 2 protiv i niko uzdržan.

Tačka 8.

Izvještaj o poslovanju JP „Vodokom“ d.o.o. Kakanj za 2016. godinu

Predlagač: Skupština JP „Vodokom“ d.o.o. Kakanj

Obrađivač: Skupština JP „Vodokom“ d.o.o. Kakanj

Izjestilac: Sead Imamović, direktor JP „Vodokom“ d.o.o. Kakanj

U diskusiji su učestvovali Sedmedin Amidić, Rešad Merdić, Haris Veispahić, Ivica Petrović i Eldin Mijoč.

Sedmedin Amidić: je u okviru svoje diskusije govorio o rashodima ovog preduzeća, te postavio pitanja u vezi isplaćenog regresa i visine istog u odnosu na negativno poslovanje javnog preduzeća, toplog obroka, troškova reklame i sponzorstva, naknada za Nadzorni odbor i Odbor za reviziju i plaćanja poreza na iste, Također tražio je i odgovore u vezi poreza za doprinose i platu, obaveza prema dobavljačima, plana otplate kredita, intelektualnih usluga, zakupa prostora, pijace, troškova plata, te kapitala preduzeća.

Rešad Merdić: je rekao da su općenito kvalitet i isporuka vode u općini Kakanj zadovoljavajući obzirom da nije bilo redukcije vode, ali je istakao da je problem u vezi otplate kredita, te izrazio zabrinutost u vezi mišljenja Nadzornog odbora.

Haris Veispahić: je rekao da je Izvještaj detaljan i temeljit, ali da ima primjedbu na metodologiju izrade istog. Rekao je da je uredno snadbijevanje vodom a da se odvoz smeća može još poboljšati. Dodao je da bi Policijska stanica Kakanj i inspekcija trebali pružiti pomoć JP „Vodokom“ d.o.o. Kakanj u pogledu parkiranja, represivnim djelovanjem, kako bi se nesmetano vršio odvoz otpada. Predložio je racionalizaciju troškova u JP „Vodokom“ d.o.o. Kakanj, ali ne na teret primanja radnika, te je ocijenio rad uprave pozitivno.

Sedmedin Amidić: je rekao da u svom izlaganju nije naveo da su protiv isplate regresa radnicima i svih ostalih primanja koja im pripadaju, ali da su protiv kršenja zakonskih normi.

Ivica Petrović: je od direktora JP tražio odgovor u vezi plaća i naknada uprave i radnika, te pitao na

osnovu koje odluke članovi Nadzornog odbora primaju naknadu i kako im se ista isplaćuje.

Eldin Mijoč: je rekao da je naknada članovima Nadzornog odbora i drugim organima upravljanja u JP određena Odlukom Općinskog vijeća i u istoj nije predviđena mogućnost upotrebe korektivnog koeficijenta, te ako se želi smanjiti naknada organima uprave u JP, tada treba pristupiti izmjeni Odluke. Zatim je rekao da je plaća uposlenicima JP regulisana kolektivnim ugovorom i koeficijent je određen uz saglasnost sindikata, te istakao da nije bilo kršenja propisa.

Ivica Petrović: je rekao da je tražio odgovor od direktora JP.

Sead Imamović: je dao odgovore na postavljena pitanja vijećnika počev od toplog obroka koji je isplaćen u skladu sa federalnim prosjekom, zatim naknade članovima Nadzornog odbora i uprave koja je isplaćena u skladu sa Odlukom Općinskog vijeća uz obrazloženje isplate istih u prošloj godini pa do poreza, kredita i svih ostalih upita. Na kraju je dodao da je Skupština JP predmetni izvještaj, uz mišljenje Nadzornog odbora i vanjskog revizora sa rezervom ipak usvojila, te predložio da, obzirom da JP nema tehnoloških problema i na osnovu pozitivne ocjene građana, Vijeće Izvještaj usvoji.

Sedmedin Amidić: je ponovo govorio o troškovima reklamiranja te postavio pitanje u vezi nacionalne strukture uposlenih u JP.

Sead Imamović: je u vezi reklamiranja rekao da za javne konkurse i javne nabavke postoji zakonska obaveza oglašavanja, te da su i ostala sredstva koja su izdvojena za reklamiranje opravdana, te da ne smatra spornim izdvojena i utrošena sredstva za naprijed navedenu namjenu. Također je rekao da je isplata regresa za 2016. godinu bila u skladu sa zakonom obzirom da je Izvještaj JP za 2015. godinu u vrijeme isplate regresa bio pozitivan i da je isti isplaćen u iznosu koji je bio neoporeziv. U vezi nacionalne strukture je rekao da je ista zadovoljena, navodeći također da Federalno ministarstvo omogućava zapošljavanje Roma.

Nakon obavljene rasprave, predsjedavajući je Izvještaj o poslovanju JP „Vodokom“ d.o.o. Kakanj za 2016. godinu stavio na glasanje i nakon glasanja konstatirao da je isti usvojen sa 19 glasova za, 3 glasa protiv i niko uzdržan.

Tačka 9.

Kolektivni ugovor o pravima i obavezama poslodavca i radnika komunalnog preduzeća JP „Vodokom“ d.o.o. Kakanj

Predlagač: Pregovarački tim i Sindikat JP „Vodokom“ d.o.o. Kakanj

Obrađivač: Pregovarački tim i Sindikat JP „Vodokom“ d.o.o. Kakanj

Izjestilac: Adnan Ibrahimspahić, član Pregovaračkog tima

Nije bilo prijavljenih za diskusiju, te je predsjedavajući Kolektivni ugovor o pravima i obavezama poslodavca i radnika komunalnog preduzeća JP „Vodokom“ d.o.o. Kakanj stavio na glasanje i nakon glasanja konstatirao da je isti usvojen sa 22 glasa za, niko protiv i niko uzdržan.

Tačka 10.

Informacija o radu Općinskog suda u Kaknju za 2016. godinu

Predlagač: Općinski sud u Kaknju

Obrađivač: Općinski sud u Kaknju

Obzirom da nije bilo prijavljenih za raspravu, predsjedavajući je Informaciju o radu Općinskog suda u Kaknju za 2016. godinu stavio na glasanje i nakon glasanja konstatirao da je ista primljena k znanju sa 22 glasa za, niko protiv i niko uzdržan.

Tačka 11.

Izvještaj o radu stalnih radnih tijela Općinskog vijeća za period januar-juni 2017. godine

Predlagač: Kolegij Općinskog vijeća

Obrađivač: Stručna služba za poslove Općinskog vijeća

Predsjedavajući je, pošto nije bilo prijavljenih za diskusiju, Izvještaj o radu stalnih radnih tijela Općinskog vijeća za period januar-juni 2017. godine stavio na glasanje i nakon glasanja je konstatirao da je isti usvojen sa 23 glasa za, niko protiv i niko uzdržan.

Tačka 12.

Izvještaj o radu Komisije za provođenje javnog nadmetanja-licitacije pri prodaji nekretnina-poslovnih prostora u vlasništvu Općine Kakanj uz prijedlog zaključka o visini naknade za članove Komisije

Predlagač: Komisija za provođenje javnog nadmetanja-licitacije pri prodaji nekretnina- poslovnih prostora u vlasništvu Općine Kakanj

Obrađivač: Komisija za provođenje javnog nadmetanja-licitacije pri prodaji nekretnina- poslovnih prostora u vlasništvu Općine Kakanj

Kako nije bilo prijavljenih za raspravu, predsjedavajući je Izvještaj o radu Komisije za provođenje javnog nadmetanja-licitacije pri prodaji nekretnina-poslovnih prostora u vlasništvu Općine Kakanj uz prijedlog zaključka o visini naknade za članove Komisije stavio na glasanje i nakon glasanja konstatirao da su isti usvojeni sa 23 glasa za, niko protiv i niko uzdržan.

Tačka 13.

Prijedlog odluke o dopuni Odluke o radnom vremenu u određenim djelatnostima

Predlagač: Edin Aliefendić, vijećnik

Obrađivač: Stručna služba za poslove Općinskog vijeća

U diskusiji su učestvovali Edin Aliefendić i Ivica Petrović.

Edin Aliefendić: je tražio, pored dopune odluke kako je u svom prvobitnom izlaganju naveo a koja se odnosi na trajanje radnog vremena za vrijeme održavanja manifestacije „Kakanjski dani“, da se u članu 3. navede da predmetna odluka stupa na snagu danom donošenja, a ne nakon objavljivanja.

Ivica Petrović: je ispred kluba HDZ-a predložio da se navedena dopuna osim na „Kakanjske dane“ odnosi i na uskršnje i božićne blagdane.

Predlagač predmetnog akta je prihvatio dopunu vijećnika Ivica Petrovića, te je predsjedavajući Prijedlog odluke o dopuni Odluke o radnom vremenu u određenim djelatnostima sa naprijed navedenim dopunama stavio na glasanje i nakon glasanja je konstatirao da je isti usvojen sa 21 glasom za, niko protiv i niko uzdržan.

Predsjedavajući se zahvalio svim prisutnim, te rekao da u radu Općinskog vijeća slijedi pauza odnosno da se u augustu neće održati sjednica Vijeća, izuzev u slučaju vanrednih okolnosti, i zaključio rad 10. redovne sjednice Općinskoga vijeća

Sjednica je završena u 13:37 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog zapisnika.

**SEKRETAR
OPĆINSKOG VIJEĆA**
Ferdo Mijač

**PREDSJEDAVAJUĆI
OPĆINSKOG VIJEĆA**
Slaven Katičić
